



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH» broj 96/13, 89/16, 5/22 i 31/24) i člana 18. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08, 5/22 i 39/25), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2022. GODINU I POSTIZBORNOG FINANSIJSKOG IZVJEŠTAJA-OPĆI IZBORI 2022. GODINE **ZA NOVE GENERACIJE**

Broj: 03-07-6-444/23
Sarajevo, 18.12.2025. godine

S A D R Ź A J

MIŠLJENJE	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet revizije	5
Cilj revizije	5
Obim revizije	5
4. PRETHODNE KONTROLE I REVIZIJE	5
5. NALAZI I PREPORUKE	5
5.1 NALAZI	5
5.2 PREPORUKE	9

MIŠLJENJE

Služba za reviziju finansiranja političkih stranaka izvršila je reviziju finansijskih izvještaja političke stranke Za nove generacije za 2022. godinu, i to: godišnjeg finansijskog izvještaja za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih 2022. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i člana 15.10 Izbornog zakona Bosne i Hercegovine, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom finansijskih izvještaja za 2022. godinu, utvrđeno je da politička stranka Za nove generacije za 2022. godinu prekršila odredbe člana 4. stav (1), člana 5. stav (4), člana 6. stav (5), člana 8. stav (1), člana 11. stav (1) i stav (2) i člana 12. stav (1) i stav (4) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaji ukazuju da je politička stranka Za nove generacije u 2022. godini postupala u skladu sa odredbama Zakona o finansiranju političkih stranaka i člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je reviziju finansijskih izvještaja političke stranke Za nove generacije za 2022. godinu, i to: godišnjeg finansijskog izvještaja za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih 2022. godine.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka. Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2022. godinu, politička stranka Za nove generacije se finansirala iz sljedećih izvora¹:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica (3-a)	243.710,00	97,35
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	3.006,09	1,20
7.	Prihodi iz budžeta (3-f)	3.625,00	1,45
8.	Prihodi od propagande (3-g)	0,00	0,00
I	Ukupni prihodi (1-8)	250.341,09	100,00
II	Ostali prihodi i drugo	0,00	0,00
	Izvori finansiranja (I+II)	250.341,09	100,00

U godišnjem finansijskom izvještaju za 2022. godinu politička stranka Za nove generacije je iskazala rashode u ukupnom iznosu od 321.296,35 KM².

2. PREDSTAVLJANJE POLITIČKE STRANKE

Naziv političke stranke je Za nove generacije. Skraćeni naziv stranke je ZNG.

Politička stranka Za nove generacije je registrovana kod Općinskog suda u Sarajevu, Rješenjem broj: 065-0-F1-22-000 004 od 14.04.2022. godine.

Sjedište političke stranke je u Sarajevu, Fetaha Bećirbegovića 8c.

Lice ovlašteno za zastupanje stranke je Damir Marjanović, predsjednik stranke.

Lice ovlašteno za podnošenje finansijskih izvještaja za 2022. godinu je Amina Džonlagić.

Prema podacima iz godišnjeg finansijskog izvještaja za 2022. godinu, politička stranka Za nove generacije ima sljedeću organizacionu strukturu:

- Centrala.

¹ Podaci iz korigovanog obrasca 3 (izvori finansiranja) godišnjeg finansijskog izvještaja za 2022. godinu, koji je Centralnoj izbornoj komisiji Bosne i Hercegovine dostavljen dana 19.09.2024. godine.

² Podaci iz korigovanog obrasca 4 (rashodi političke stranke) godišnjeg finansijskog izvještaja za 2022. godinu, koji je Centralnoj izbornoj komisiji Bosne i Hercegovine dostavljen dana 19.09.2024. godine.

3. OPIS PREGLEDA I KONTROLE FINANSIJSKOG IZVJEŠTAJA

Predmet revizije je godišnji finansijski izvještaj političke stranke Za nove generacije za 2022. godinu i finansijski izvještaj za period od dana podnošenja prijave za ovjeru za izbore do dana ovjere rezultata Općih izbora, održanih 2022. godine.

Cilj revizije je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je politička stranka Za nove generacije u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.

Obim revizije finansijskih izvještaja političke stranke Za nove generacije obuhvata kontrolu finansijske dokumentacije i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih lica i troškove izborne kampanje.

4. PRETHODNE KONTROLE I REVIZIJE

Pregled i revizija finansijskih izvještaja obavlja se prvi put.

5. NALAZI I PREPORUKE

5.1 NALAZI

a) Politička stranka Za nove generacije prekršila je odredbe člana 4. stav (1) Zakona o finansiranju političkih stranaka³.

(1) Politička stranka Za nove generacije je u korigovanom godišnjem finansijskom izvještaju za 2022. godinu, iskazala rashode u ukupnom iznosu od 321.296,35 KM.

U Finansijskom planu za 2022. godinu, stranka je planirala ukupne troškove u iznosu 244.524,00 KM.

Analizom Finansijskog plana za 2022. godinu i podataka iz korigovanog godišnjeg finansijskog izvještaja za 2022. godinu, utvrđeno je da je stranka sredstva utrošila mimo Finansijskog plana za 2022. godinu, i to:

- Stranka nije planirala sljedeće troškove: troškove poštarine i internet usluga, troškove usluga, troškove neproizvodnih usluga, troškove knjigovodstvenih usluga, troškove prevoza, donacije pravnim licima i troškove reprezentacije.

U finansijskom izvještaju stranka je troškove poštarine i internet usluga iskazala u iznosu od 395,85 KM, troškove usluga u iznosu od 35,10 KM, troškove neproizvodnih usluga u iznosu od 500,00 KM, troškove knjigovodstvenih usluga u iznosu od 1.638,00 KM, troškove prevoza u iznosu od 145,00 KM, donacije pravnim licima u iznosu od 400,00 KM i troškove reprezentacije u iznosu od 729,18 KM, odnosno ukupno 3.843,13 KM.

- Stranka je planirane troškove platnog prometa prekoračila za 98,25 KM, a takse, novčane kazne i sl. za 692,16 KM.

U obrascu 4.1 (režijsko administrativni i ostali troškovi) stranka je iskazala troškove platnog prometa u iznosu od 237,25 KM, a iste je planirala u iznosu od 139,00 KM. Takse, novčane kazne i sl. stranka je planirala u iznosu od 1.191,00 KM, dok je iste ostvarila u iznosu od 1.883,16 KM.

- Stranka je planirane troškove izborne kampanje prekoračila za 120.398,69 KM⁴.

³ Finansijska sredstva iz člana 3. stav (1) Zakona o finansiranju političkih stranaka, politička stranka može koristiti isključivo za ostvarivanje ciljeva utvrđenih svojim programom i statutom.

U programu utroška sredstava, politička stranka je troškove izborne kampanje planirala u ukupnom iznosu od 206.500,00 KM.

Uvidom u strukturu planiranih troškova izborne kampanje utvrđeno je da stranka nije planirala troškove oglašavanja u medijima (štampanim i elektronskim), troškove internet-oglašavanja i troškove organizacije i održavanja predizbornih skupova. Prema podacima iz dokumentacije, politička stranka je troškove oglašavanja u medijima (štampanim i elektronskim) ostvarila u iznosu od 70.232,60 KM, troškove internet-oglašavanja u iznosu od 25.989,06 KM, a troškove organizacije i održavanja predizbornih skupova u iznosu od 4.816,33 KM. Takođe, uvidom u program utroška sredstava utvrđeno je da stranka nije planirala sredstva za kreativni koncept dizajna i pripremu svih materijala, a iste je ostvarila u iznosu od 18.954,00 KM.

Pored navedenog, utvrđeno je da je politička stranka prekoračila troškove štampanja plakata i plakatiranja za 406,70 KM. Naime, troškove štampanja plakata i plakatiranja politička stranka je planirala u iznosu od 101.700,00 KM, a iste je ostvarila u iznosu od 102.106,70 KM.

S obzirom da je finansijska sredstva u iznosu od 125.032,23 KM ostvarila mimo Finansijskog plana za 2022. godinu, politička stranka je prekršila odredbe člana 4. stav (1) Zakona o finansiranju političkih stranaka.

- (2) Uvidom u poslovne knjige utvrđeno je da je politička stranka na kontu troškova zakupnine poslovnog prostora evidentirala troškove u iznosu od 3.000,00 KM po osnovu zakupnine za decembar 2021. godine i januar 2022. godine.

S obzirom da je politička stranka Za nove generacije registrovana kod Općinskog suda u Sarajevu, Rješenjem broj: 065-0-F1-22-000 004 od 14.04.2022. godine, nesumnjivo je utvrđeno da navedeni trošak nije nastao za obavljanje aktivnosti ove političke stranke.

b) Politička stranka prekršila je odredbe člana 5. stav (4) i člana 8. stav (1) Zakona o finansiranju političkih stranaka.

- (1) Politička stranka Za nove generacije u poslovnim knjigama i godišnjem finansijskom izvještaju nije iskazala nenovčanu donaciju po osnovu besplatne objave na društvenoj mreži „Facebook“, čime je prekršila odredbe člana 5. stav (4) Zakona o finansiranju političkih stranaka.

Uvidom u dostupne podatke o oglašavanju na društvenoj mreži „Facebook“, utvrđeno je da je na stranici Tarik Jažić objavljena jedna reklama u vrijednosti do 100,00 KM.

S obzirom da politička stranka nije dostavila dokumentaciju o ovoj objavi, te da se ne može utvrditi ko je platio objavu na društvenoj mreži, politička stranka je ostvarila nenovčanu donaciju anonimnog donatora, što je zabranjeno odredbama člana 8. stav (1) Zakona o finansiranju političkih stranaka.

Politička je imala obavezu da u poslovnim knjigama i godišnjem finansijskom izvještaju iskaže nenovčanu donaciju koju je ostvarila po osnovu oglašavanja na društvenoj mreži bez naknade.

- (2) Politička stranka nije izdala potvrde fizičkim licima koja su dala priloge političkoj stranci, čime je prekršila odredbe člana 5. stav (4) Zakona o finansiranju političkih stranaka i člana 6. Pravilnika o godišnjim finansijskim izvještajima političkih stranaka.

U toku obavljanja revizije finansijskih izvještaja utvrđeno je da je politička stranka sklopila pojedinačne ugovore o donaciji sa fizičkim licima-donatorima političke stranke, što ne predstavlja potvrdu o primljenim donacijama, niti sadrži sve elemente propisane odredbama člana 6. Pravilnika o godišnjim finansijskim izvještajima političkih stranaka.

⁴ U odnosu na Preliminarni izvještaj o reviziji finansijskih izvještaja izvršena je korekcija nalaza o troškovima izborne kampanje.

c) Politička stranka Za nove generacije prekršila je odredbe člana 6. stav (5) Zakona o finansiranju političkih stranaka.

Politička stranka primila je priloge člana političke stranke koji su za 225,81 KM veći u odnosu na dozvoljeni limit na visinu priloga članova političke stranke, čime je prekršila odredbu člana 6. stav (5) Zakona o finansiranju političkih stranaka⁵.

Uvidom u izvode sa transakcijskog računa i godišnji finansijski izvještaj političke stranke utvrđeno je da je politička stranka primila novčane priloge člana političke stranke Adne Bešić u iznosu od 15.000,00 KM, te nenovčanu donaciju po osnovu sponzoriranih objava koje je stranka u finansijskom izvještaju iskazala u iznosu od 225,81 KM, odnosno ukupno 15.225,81 KM.

d) Za nove generacije prekršila je odredbe člana 11. stav (1) i stav (2) i člana 12. stav (1) i stav (4) Zakona o finansiranju političkih stranaka.

Na osnovu obavljene revizije finansijskih izvještaja za 2022. godinu, utvrđeno je da politička stranka Za nove generacije nije vodila pravilne, pravovremene i potpune evidencije o svojim sredstvima, prihodima, rashodima i obavezama, nije izvršila usaglašavanje obaveza sa dobavljačima, čime je prekršila odredbe člana 11. stav (1) i člana 12. stav (1) Zakona o finansiranju političkih stranaka.

Politička stranka u finansijskom izvještaju nije iskazala tačne podatke o prihodima, rashodima i obavezama, čime je prekršila odredbe člana 12. stav (4) Zakona o finansiranju političkih stranaka i odredbe Pravilnika o godišnjim finansijskim izvještajima političkih stranaka (u daljem tekstu: Pravilnik).

(1) Politička stranka je u ostavljenom roku, izvršila korekciju obrazaca godišnjeg finansijskog izvještaja za 2022. godinu, čime je djelimično otklonila nedostatke u finansijskom izvještaju.

Politička stranka je uz obrasce godišnjeg finansijskog izvještaja, Centralnoj izbornoj komisiji Bosne i Hercegovine dostavila i Bruto bilans za period 01.01.2022. godine do 31.12.2022. godine, ovjeren od strane certifikovanog računovođe, iz kojeg je vidljivo da je u toku 2024. godine izvršeno dodatno knjiženje u poslovnim knjigama za 2022. godinu, na kontima osnovnih sredstava, novčanih sredstava (transakcijski račun), prihodima, rashodima i obavezama. Politička stranka uz očitovanje nije dostavila pojedinačne analitičke kartice osnovnih sredstava, novčanih sredstava, prihoda, rashoda i obaveza nakon korekcije knjiženja.

- Za nove generacije je izvršila korekciju knjiženja na kontu transakcijskog računa i ispravila stanje novčanih sredstava na dan 31.12.2022. godine, čime je uskladila poslovne knjige sa stvarnim stanjem.
- Politička stranka u korigovanom obrascu 3-e (nenovčane donacije i računi koje politička stranka nije imala obavezu da plati) godišnjeg finansijskog izvještaja za 2022. godinu, koji je dostavila nakon Preliminarnog izvještaja o reviziji godišnjeg finansijskog izvještaja za 2022. godinu i postizbornog finansijskog izvještaja-Opći izbori 2022. godine, prijavila nenovčanu donaciju pravnog lica "Voćar" d.o.o. Brčko u vidu prehrambenih artikala u iznosu od 729,18 KM.

Stranka je, takođe, u korigovanom obrascu 3-e godišnjeg finansijskog izvještaja za 2022. godinu prijavila nenovčanu donaciju Knjigovodstvenog biroa FIR.BA d.o.o. Sarajevu u iznosu od 1.638,00 KM. U godišnjem finansijskom izvještaju za 2022. godinu koji je dostavljen dana 31.03.2023. godine, politička stranka je iskazala nenovčanu donaciju Knjigovodstvenog biroa FIR.BA d.o.o. Sarajevu u iznosu za 1.404,00 KM.

- U korigovanom godišnjem finansijskom izvještaju za 2022. godinu politička stranka je nenovčane donacije po osnovu sponzoriranih objava tri fizička lica: Adna Bešić u iznosu od 225,81 KM, Minela Bućan u iznosu od 281,28 KM i Zlatko Miletić u iznosu od 131,82 KM

⁵ Ukupan iznos koji član političke stranke uplati na ime stranke u toku jedne kalendarske godine ne može prelaziti iznos od 15.000,00 KM (petnaest hiljada konvertibilnih maraka), što uključuje i članarine.

iskazala u obrascu 3-e godišnjeg finansijskog izvještaja. Uvidom u dostavljene dokaze o nenovčanim donacijama, koji su predloženi tokom obavljanja revizije, nismo mogli potvrditi iskazani iznos svih prijavljenih nenovčanih donacija, što ukazuje da stranka nije vodila tačne i pravilne evidencije o prihodima, te da nema vjerodostojnu dokumentaciju o nenovčanim donacijama.

- (2) Politička stranka u godišnjem finansijskom izvještaju nije iskazala nenovčanu donaciju fizičkog lica po osnovu objave na društvenoj mreži „Facebook“, čime je prekršila odredbe člana 13. i 18. Pravilnika.
- (3) Politička stranka Za nove generacije nije u godišnjem finansijskom izvještaju iskazala tačne podatke o svojim rashodima i obavezama, čime je prekršila odredbe člana 21, 22, 23. i 24. Pravilnika.

Tokom obavljanja revizije finansijskih izvještaja utvrđeno je i da politička stranka u poslovnim knjigama nije uspostavila potpune, pravovremene i pravilne evidencije o rashodima i obavezama.

- Politička stranka nije vodila pravilne i potpune evidencije o troškovima zakupnine poslovnog prostora.

Uvidom u Ugovor o podzakup poslovnog prostora, koji je zaključen između „T-PANORAMA“ d.o.o. Sarajevo i političke stranke dana 15.04.2022. godine, utvrđeno je da su troškovi zakupa poslovnog prostora u periodu od 01.05. do 31.12.2022. godine iznosili 12.168,00 KM.

Politička stranka je u korigovanom obrascu 4.1 (režijsko-administrativni i ostali troškovi) godišnjeg finansijskog izvještaja iskazala troškove zakupa poslovnog prostora u ukupnom iznosu od 12.168,00 KM. Politička stranka je u korigovanom Bruto bilansu za period od 01.01.2022. godine do 31.12.2022. godine troškove zakupa poslovnog prostora evidentirala u iznosu od 12.168,00 KM, a isti su prije korekcije iznosili 12.126,00 KM.

Korekcijom obrazaca godišnjeg finansijskog izvještaja, politička stranka je troškove zakupa poslovnog prostora uskladila sa ugovorenim iznosom zakupnine, međutim, politička stranka u poslovnim knjigama nije evidentirala troškove zakupa poslovnog prostora za novembar i decembar 2022. godine u iznosu od 3.042,00 KM, niti obaveze prema zakupodavcu.

Naime, politička stranka je evidentirala troškove zakupa poslovnog prostora za period maj-oktobar 2022. godine u iznosu od 9.126,00 KM i troškove zakupa za period decembar 2021. i januar 2022. godine u iznosu od 3.042,00 KM, te je iste iskazala u okviru troškova zakupa poslovnog prostora u obrascu 4.1 godišnjeg finansijskog izvještaja političke stranke za 2022. godinu. Uvidom u Ugovor o pozajmici zaključen između fizičkog lica Z.M. i Damira Marjanovića, pravnog zastupnika političke organizacije/inicijative u osnivanju „Za nove generacije“ od 01.12.2021. godine, utvrđeno je da se Z.M. obavezao da će sklopiti Ugovor o zakupu kancelarijskog prostora za potrebe političke stranke, te da će platiti zakupninu za decembar 2021. godine i januar 2022. godine. U ugovoru je naveden iznos pozajmice od 3.000,00 KM, što je stranka proknjižila kao trošak zakupa poslovnog prostora i obavezu po osnovu pozajmice prema fizičkom licu. Politička stranka je u korigovanom godišnjem finansijskom izvještaju za 2022. godinu iskazala obavezu prema fizičkom licu Z.M. u iznosu od 42,00 KM, iako je pozajmica u iznosu od 3.000,00 KM vraćena dana 13.12.2022. godine.

- Politička stranka je u korigovanom godišnjem finansijskom izvještaju izmijenila podatke o troškovima knjigovodstvenih usluga, troškovima telefona i interneta i troškovima izborne kampanje, te je dodala troškove reprezentacije. Uvidom u korigovani Bruto bilans utvrđeno je da je izvršena ispravka knjiženja i u poslovnim knjigama za 2022. godinu.
- Za nove generacije nije u godišnjem finansijskom izvještaju iskazala tačne podatke o troškovima izborne kampanje.

1. Stranka u godišnjem finansijskom izvještaju nije iskazala troškove izborne kampanje po osnovu objave na stranici Tarik Jažić na društvenoj mreži „Facebook“.

2. Stranka je u korigovanom obrascu 4.2 (troškovi propagande), troškove propagande iskazala u ukupnom iznosu od 295.233,03 KM, kako slijedi: troškovi štampanja plakata i plakativiranja u iznosu od 17.657,39 KM, troškovi oglašavanja u štampanim i elektronskim medijima u iznosu od 131.715,77 KM, troškovi internet-oglašavanja u iznosu od 22.707,17 KM, troškovi organizacije i održavanja predizbornih skupova u iznosu od 76.865,80 KM, troškovi štampanja, umnožavanja i slanja predizbornog materijala biračima u iznosu od 10.964,68 KM i ostali troškovi propagande u iznosu od 35.322,22 KM.

Stranka je naknadno, nakon Preliminarnog izvještaja o reviziji godišnjeg finansijskog izvještaja za 2022. godinu i postizbornog finansijskog izvještaja-Opći izbori 2022. godine, izvršila dodatno knjiženje troškova izborne kampanje u iznosu za 5.367,30 KM.

- Služba za reviziju je utvrdila da politička stranka nije izvršila usaglašavanje obaveza sa svojim povjeriocima, odnosno nije izvršila popis obaveza na dan 31.12.2022. godine.

Naime, politička stranka je u poslovnim knjigama i godišnjem finansijskom izvještaju, koji je dostavila 31.03.2023. godine iskazala obaveze prema dobavljaču „Ascanius media“ d.o.o. Sarajevo⁶ u iznosu od 68.122,60 KM. Uvidom u Izvod otvorenih stavki na dan 31.12.2022. godine, utvrđeno je da stranka na dan 31.12.2022. godine imala obaveze prema ovom dobavljaču u iznosu od 73.489,90 KM. Politička stranka je naknadno, nakon Preliminarnog izvještaja o reviziji godišnjeg finansijskog izvještaja za 2022. godinu i postizbornog finansijskog izvještaja-Opći izbori 2022. godine, izvršila korekciju obrasca 5 (obaveze političke stranke) godišnjeg finansijskog izvještaja za 2022. godinu i iskazala obaveze prema dobavljaču „Ascanius media“ d.o.o. Sarajevo u iznosu od 73.489,90 KM.

- (4) Uvidom u finansijsku dokumentaciju političke stranke i knjigovodstvene isprave, utvrđeno je da računi nisu ovjereni za knjiženje i plaćanje, što ukazuje da nije uspostavljena formalna i suštinska kontrola knjigovodstvenih isprava, a što je propisano i Pravilnikom o računovodstvu političke stranke.

Troškovi izborne kampanje

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM⁷ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, politička stranka Za nove generacije je u svrhu izborne kampanje za Opće izbore 2022. godine mogla potrošiti 428.146,00 KM.

Za nove generacije je u obrascu 4.2 korigovanog postizbornog i godišnjeg finansijskog izvještaja za 2022. godinu iskazala troškove izborne kampanje u iznosu od 295.233,03 KM. Ovaj iznos troškova izborne kampanje nije konačan jer stranka nije iskazala troškove oglašavanja na društvenoj mreži “Facebook”.

5.2 PREPORUKE

Preporučuje se političkoj stranci Za nove generacije da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

⁶ Novi naziv „Direct media” d.o.o.

⁷ Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

- *da finansijska sredstva obezbijedena za finansiranje stranke koristi u skladu sa utvrđenim programom utroška sredstava,*
- *da, u skladu sa odredbom člana 5. stav (4) Zakona o finansiranju političkih stranaka, sve priloge prijavljuje u finansijskom izvještaju i da sačinjava potvrde u skladu sa članom 6. Pravilnika o godišnjim finansijskim izvještajima političkih stranaka,*
- *da priloge fizičkih lica i članova političke stranke prima u iznosima koji ne prelaze zakonom dozvoljeni limit na visinu priloga,*
- *da se ne finansira iz zabranjenih izvora,*
- *da vodi poslovne knjige u skladu sa računovodstvenim propisima, odnosno da vodi potpune, pravovremene i pravilne evidencije o svojim sredstvima, prihodima, rashodima i obavezama i*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.*

Takođe se preporučuje:

- *da usaglasi svoje obaveze sa dobavljačima i provede odgovarajuća knjiženja u poslovnim knjigama i*
- *da uspostavi procedure internih kontrola u vezi sa procesom trošenja finansijskih sredstava stranke.*

KOMENTAR:

U ostavljenom roku, politička stranka Za nove Generacije izvršila je korekciju obrazaca godišnjeg finansijskog izvještaja za 2022. godinu i postizbornog finansijskog izvještaja-Opći izbori 2022. godine, čime je djelimično otklonila nedostatke u popunjavanju finansijskih izvještaja. Politička stranka je uz korigovane obrasce godišnjeg finansijskog izvještaja, Centralnoj izbornoj komisiji Bosne i Hercegovine dostavila i Bruto bilans za period 01.01.2022. godine do 31.12.2022. godine, ovjeren od strane certifikovanog računovođe, iz kojeg je vidljivo da je u toku 2024. godine izvršeno dodatno knjiženje u poslovnim knjigama za 2022. godinu, na kontima osnovnih sredstava, novčanih sredstava (transakcijski račun), prihodima, rashodima i obavezama. Politička stranka nije dostavila pojedinačne analitičke kartice osnovnih sredstava, novčanih sredstava, prihoda, rashoda i obaveza nakon korekcije knjiženja.

Služba za reviziju je uvažila sve ispravke izvršene u finansijskim izvještajima i u skladu sa istim korigovala nalaze revizije iz preliminarog izvještaja.

Zahvaljujemo se tehničkom sekretaru i ovlaštenom licu za finansijske izvještaje političke stranke Za nove generacije na dobroj i korektnoj saradnji tokom obavljanja revizije.

Šef Odsjeka za revizijske poslove, revizor

Sanja Tošović

Šef Odsjeka za prerezivizijske i administrativne poslove, pomoćnik revizora

Rijad Selmanović